



Sambanwá

GIYA SA PAGSAMBA KAN BANWAAN NIN DIOS

SOLEMNIDAD KAN PAMARETA KAN ANGEL KI MARIA
25 MARZO 2021 • PUTI

RITO SA PAGPOÓN

Pataratara

C — “Asin an Verbo Nani-tawo”

Sa kada ika-duwang pulong may lima kan Marzo, siyam na bulan bâgo an pasko kan pagkamundag, ginigiromdom niato an pagbareta kan Angel ki Maria na kun saen siya pinili na magin Ina nin Paratubos. Si Maria an bâgong Eva na nagpahiling nin dakulang pagtubod sa Dios. Siya nangidam sa kapangyarihan nin Espiritu Santo. An pangyayaring ini sarong dakulang kabtang sa estoria nin katawohan nin huli ta sa dakulang pagkamoot nin Dios pinili niyang magin tawo para an gabos makaligtas sa kasâlan. Sabi ni Maria: “Maotob lugod sa sako siring sa saimong tataramon.” Ini sarong pahayag nin pagdusay sa kabôtan nin Dios. Satuyang pasalamatan si Virgen Maria kan saiyang pag-ako kan pangapodan nin Dios. Magin panalmingan lugod niato si Santa Maria sa saiyang kapakumbabaan sa atubang nin Dios.

Antifona sa Paglaog

(He 10, 5 He 7)

(Sinambit kun mayo nin Awit sa Paglaog)

An Kagurangnan, sa paglaog sa kinaban, nagsabi: Uya ako madatong tanganing utobon an saimong kabôtan, O Dios.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa

tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boôt. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpaparâ kan mga kasâlan kan kinaban, kaheraki kami; ika na nagpaparâ kan mga kasâlan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios, na nagboôt na an saimong Tataramon mag-ako kan tunay na laman nin tawo sa popônan ni Virgen Maria, warasan, namimibi kami, na kaming nagpapahayag nin pagtubod na an samong Paratubos Dios asin tawo,

magkanigong makisumarô sa saiya man sanang pagkadios. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (Tukaw)

(Isaias 7, 10-14)

An mga tawo kan panahon ni Ahaz naghahalat kan pagdatong nin sarong hade na magikan sa harong ni David. Sa saiya ipapadara nin Dios an kaligtasan para sa gabos. An tanda kan pagdatong dai hinagad ni Ahaz, alagad ini itinao nin Dios: Sarong Omboy an ipapangaki asin ngangaranan siyang “Emmanuel”, boôt sabihon: “an Dios uya sa satuya.”

Pagbasa sa Libro ni Profeta Isaias

Nagpadara pa nin mensaje an Kagurangnan ki Ahaz: “Maghagad ka nin tanda sa Kagurangnan na saimong Dios. Pwedeng an tanda hale sa irarom kan kinaban kan mga gadan o hale sa kaitaasan nin langit.” Nagsimbag si Ahaz, “Dai ako mahagad nin tanda. Habo kong baloon an Kagurangnan.” Nagsabi si Isaias, “Padangog kun siring, kapagarakian ni Hadeng David. Dikit pa daw sa saindo an pagbalo kan pagkamatinius kan tawo, ta binabalo pa nindo an pagkamatinius nin sakong Dios? Kaya an Kagurangnan mismo an matao saindo nin tanda: may sarong daraga na mngingidam asin mangangaki nin lalaki asin aapodon niyang Emmanuel.

Tataramon kan Kagurangnan.

Gabos — Salamat sa Dios.

Salmo Responsorio

(Salmo 40, 7-8. 8-9. 10. 11)

S — Uya ako, Kagurangnan, sa pag-utob kan saimong kabotan.

1. Dangan ako nagsabi, “Uya ako; mga katukdoan mo para sako nasusurat sa libro. O Dios ko, naogma ako sa pag-utob kan kabotan mo; an saimong tugon

rimpos ko sa sakuyang puso.”
(S)

2. O Dios naoogma ako sa pag-utob kan kabôtan mo; an saimong tugon rimpos ko sa sakuyang puso.” Kagurangnan, sa katiriponan kan saimong banwaan, ipapahayag ko an marahay na bareta nin kaligtasan. Aram mong dai ako mauntok sa pagrokyaw kaiyan. (S)
3. An bareta nin kaligtasan dai ko tinago para sa sako lamang; ibinareta ko an saimong pagkamaimbod asin kaligtasan! Dai ko tinago sa katiriponan an danay mong pagkamoot asin pagkamaimbod. (S)
4. Hare pagsayumahan sako an saimong pagkamaherak, Kagurangnan. Ingatan lugod ako kan saimong pagkamaimbod asin danay na pagkamoot. (S)

Ikaduwang Babasahon

(Hebreo 10, 4-10)

Sa babasahon ipinapasabot satuya an pinaggikanan kan mision ni Cristong nani-tawo sa pag-utob kan kabôtan nin Ama. Siya napadigdi sa kinaban tanganing magtogdas nin bâgong tipan, asin tuboson sa pagkakasalà an katawohan. Liwat kitang nabuhay sa espiritu, nin huli sa pag-atang ni Jesus kan saiyang sadiri sa ipinag-boót nin Ama. Kita man lugod magin makinuyog-kuyog sa kabôtan nin Dios.

Pagbasa sa Surat sa mga Hebreo.

Huli ta an dugo kan mga toro asin mga kanding dai naggad makakapara kan mga kasâlan. Kaya kan si Cristo magdigdi sa kinaban, nagsabi siya sa Dios, “Mga sacrificio saka atang dai mo minamawot alagad inandam mo an sarong hawak para sako. Dai mo nawilihan an tinutong na atang, ni an mga dolot para sa mga kasâlan. Kaya nagsabi ako, “Uya ako, O Dios, tanganing mag-otob kan saimong kabotan, siring sa nasusurat dapit sako sa libro kan Katugonan.” Enot nagsabi si Cristo, “Habo ka asin dai mo ikinakaogma an sacrificio asin mga dolot, o an mga tinutong asin ang mga dolot para sa mga kasâlan.” Sinabi niya ini maski an mga sacrificio idinolot susog sa Katugonan. Dangan nagsabi siya, “Uya ako, O Dios, tanganing mag-utob kan saimong kabôtan.” Kaya hinale nin Dios an gabos na daan na atang sa isinalihid an atang ni Cristo an sadiri niyang hawak makasarong beses para sa gabos na panahon.

Tataramon kan Kagurangnan.
Gabos — Salamat sa Dios.

Pagrokyaw (Tindog)

(Dai sinasambit an Alleluia)

An tataramon nagin tawo asin nag-erok sa kaibahan niato, pano nin biyaya saka katotoohan. Nahiling mi an saiyang kamurawayan, an kamurawayan na itinao saiyang kan saiyang Ama bilang Bogtong niyang Aki.

Evangelio

(Lucas 1, 26-38)

Ipinapahayag ni San Lucas an mision ni Cristo “Itatao saiyang Dios an trono ni David na saiyang Ama.” Siya, na gikan sa kapag-arakan ni David, an madara nin kaligtasan sa bilog na kinaban. An dara niyang kaligtasan itatao sa lambang tawo sa buhay na ini asin man sa buhay na maabot. Siring man, inaapodan kita na makisumarô asin makikooperar sa plano nin Dios para sa kaligtasan nin gabos, siring sa ipinahiling ni Maria: “Maotob lugod siring sa saimong itinaram.”

P — An Kagurangnan mapa-saindo.

B — **Asin sa saimong espiritu.**

P — ✠ Pagbasa kan Evangelio susog ki San Lucas.

B — **Kamurawayan saimo, Kagurangnan.**

Kan ika-anom nang bulan kan pagbados ni Isabel, an angel na si Gabriel sinugo nin Dios sa sarong banwaan nin Galilea, na an ngaran Nazareth, sa sarong daraga na an ngaran Maria na nakatalaan nang ikasal ki José, sarong lalaki na gikan sa kapagarakian ni David. Nagdolok ki Maria an angel dangan nagsabi, “An katoninongan mapa-saimo, paladan na babae! An Kagurangnan yaon saimo!” Napurisaw si Maria kan mga tataramon na ini asin pinag-isip-isip niya kun ano an kahulugan kaiyan. Kaya sinabihan siya kan angel, “Dai ka matakot, Maria, huli ta nawiwilihan ka nin Dios. Mangingidam ka asin mangangaki nin lalaki; Jesus an ingangan mo saiyang. Magigin dakula siya saka aapodon na Aki kan Kahorohlangkaweng Dios. Itatao saiyang nin Kagurangnan na Dios an trono ni David na saiyang ginikanan. Maghahade siya sa kapagarakian ni Jacob sagkod lamang; an saiyang kahadean mayong kataposan!” “Paanong mangyari na mayo akong agom?” an hapot ni Maria. Nagsimbag an angel: Mahilig saimo an Espiritu Santo asin lilindongan ka kan kapangyarihan kan

Kahorohlangkaweng Dios. Kaya banal an ipapangaki mo aapodon Aki nin Dios. Natatandaan mo an pinsan mong si Isabel? Pinagsasabi na dai siya mangangaki, alagad nangidam siya maski ngani kurang na nin marahay. Ngonian anom na bulan siyang bados, huli ta mato nin imposible sa Dios.” Nagsabi si Maria, “Oripnan ako nin Kagurangnan; mangyari man lugod sako susog sa saimong tataramon.” Dangan binayaan siya nin angel.

P — Marahay na Bareta kan Kagurangnan.

B — **Pag-omaw saimo Cristo.**

Homilia (Tukaw)

Pagrokyaw

kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiyang nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaluhod.)

Asin nani-laman huli kan Espiritu Santo ki Virgen Maria, asin nani-tawo.

Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Sa maimbod na pagkuyog ni Virgen Maria, an Dios nanilaman. An misterio kan pagkani-tawo kan Dios nag-aalok sato sa mamomoton na Ama huli kan saiyang Aking nani-tawo.

S — **Kagurangnan, hinanyoga an samong pamibi.**

1. Tanganing an Simbahan padagos na mamidbidan bilang danay na presencia asin hawak ni Jesu Cristo sa kinaban, ipamibi niato sa Kagurangnan. (S)
2. Tanganing an mga tawong may marahay na boót makanood na si Cristo nakisumaro sa lambang sarô sa saiyang pagkani-tawo, ipamibi niato sa Kagurangnan. (S)
3. Tanganing an mga may inadalan sa ciencia asin tecnologia maghinggang mapauswag an dignidad asin kaogmahan nin katawohan, ipamibi niato sa Kagurangnan. (S)
4. Tanganing an mga ina na bados maogmang magsabat sa bâgong-buhay siring ki Virgen Maria na nagsabat sa saiyang Aki, ipamibi niato sa Kagurangnan. (S)
5. Tanganing an mga gadan na mapatawad sa saindang mga kasâlan, ipamibi niato sa Kagurangnan. (S)

P — Ama kan Tataramon na nani-tawo, dinodolot mi an samuyang mga kahagadan saimo, an mga kaipuhan sa samuyang aroaldaw na pamuhay-buhay na pinabanal kan saimong Aki, samuyang Kagurangnan. Siya na nabubuhay asin naghahade sa kapanahonan kan mga panahon.

B — **Amen.**

LITURGIA KAN EUCARISTIA

Pagdolot (*Tukaw*)

(*Sinasambit kun mayong Awit sa Pagdolot*)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — O Dios na makakamhan, magkanigong akoa an atang kan saimong Simbahan, tanganing nagmimidbid na an saiyang mga kapinônan yaon sa pagkani-tawo kan Bogtong mong Aki, mag-ogma siyang magcelebrar sa Solemnidad na ini kan mga misterio ni Cristo. Huli ki Cristo samong Kagurangnan.

B — **Amen.**

Prefacio

An Misterio kan Pagkani-tawo.

P — An Kagurangnan mapasaindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran: huli ki Cristo samong Kagurangnan.

Ta an Virgen maimbod na nagdangog sa langitnon na pamareta, na an mamumundag sa tahaw nin katawohan asin para sa katawohan huli kan pagsangkob kan anino kan Espiritu Santo, dinara niya sa pagkamoot sa saiyang daing-digtang popônan, tanganing an katotoohan kan mga panuga sa mga aki ni Israel mangyari, asin sa dai-masabing paagi, an paglaom kan mga nasyon mahaman.

Kaya an hukbô nin mga Angeles nagsasamba kan saimong kamahalan, nag-oogma sa atubang mo sagkod pa man. Nag-aarang kami na ipagboót mo na makasanong sainda an samong mga tingog, sa kaogmahan nin mga magkairiba na nagsasabi:

Gabos — **Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an**

minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (*Luhod*)

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — **Amen.**

RITO SA PAGCOMUNION

Ama Niamo (*Tindog*)

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — **Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalà samuya; asin hare kami pagdaraha sa sugot; kundi agawa kami sa maraot.**

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saimo, an sakong katoninongan itinatao ko saimo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — **Amen.**

Pagpahayag kan Katoninongan

P — An katoninongan kan Kagurangnan danay na mapa-saindo.

B — Asin sa saimong espiritu.

P — Magpatinaraohan kamo nin katoninongan

Cordero

B — Cordero kan Dios, na nagpaparà kan mga kasàlan kan kinaban: kaheraki kami. Cordero kan Dios, na nagpaparà kan mga kasàlan kan kinaban: kaheraki kami. Cordero kan Dios, na nagpaparà kan mga kasàlan kan kinaban: tawi kami nin katoninongan.

Pag-alok sa Pagcomunion *(Luhod)*

P — Uya an Cordero kan Dios, uya an nagpaparà kan mga kasàlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Is 7, 14)

(Sinambit kun mayong Awit sa Comunion)

Uya an Virgen mangingidam asin mangangaking Lalaki, asin an saiyan ngaran aapodon Emmanuel.

Pamibi Pakacomunion *(Tindog)*

P — Mamibi kita.

Kagurangnan, namimibi kami, parìgona sa samong mga isip an mga Sacramento kan tunay na pagtubod, tanganing nagpapahayag kan pagtubod na an ipinangidam kan Virgen Dios asin tawong totoo, magkanigo kaming makaabot, huli kan kapangyarihan kan saiyan nakakaligtas na pagkabuhay-liwat, sa kaogmahan na daing kasagkoran. Hull ki Cristo samong Kagurangnan

B — Amen.

RITO SA PAGTAPOS

Solemneng Bendicion

P — An Kagurangnan mapa-saindo.

B — Asin sa saimong espiritu.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.

ORATIO IMPERATA TUMANG SA PAGLAKOP KAN VOVID-19

Amang maheherakon asin mapagmakulog, minadulok kami saimong pangangaipo. Hinahagad mi saimong pagligtas samo tumang sa pandemia kan COVID-19 na naglalakop ngonian asin nagdadara nin kagadanan.

Hinahagad mi saimong ngonian na lilingya kami nin may pagkamoot, asin huli kan saimong nakakaomay na kamot, maparà samo an takot na dara kan helang asin kagadanan, maibalik an samong paglaom, asin mapakusog an samong pagtubod.

Ipinapamibi niamo na giyahan mo an mga tawong naghingowa sa paghanap nin bulong asin sa pag-adal kan paglakop kaining helang.

Nagpapasalamat kami huli kan mga bakunang napagkanigong mahimo huli kan saimong mapag-antabay na mga kamot.

Bendicioni an samong mga paghingowa na gamiton ining mga bakuna tanganing mapundo an pandemia sa samuyang nasyon.

Ipinapamibi niamo an mga eksperto sa salud, tangani na sinda man makatabang nin may maninigong kakayahan asin pagmakulog sa mga may helang.

Warasan sainda an karahayan sa isip asin sa hawak, kusog sa pagdusay kan saindang sadiri, asin kaligtasan tumang sa kahelangan.

Ipinapamibi mi man an mga tinamaan na kan helang. Sinda man lugod maomayan tulos. Ligtasan idtong mga nangangataman sainda. Warasan sa mga nagadan an kapahingaloan na daing kasagkoran.

Itao mo samo an biyaya na maghingowa para sa karahayan kan gabos asin sa mga nangangaipo. Lugod an samong pagmangno asin pagmakulog sa lambang sarô maghawas samo ngonian na panahon nin kasakitan asin magdara samo sa pagbabagong-buhay asin kabanalan.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon. Amen.

V. Divino Rostro
R. Kaheraki kami.

V. Nuestra Señora de Peñafrancia
R. Ipamibi mo kami.

V. San Jose
R. Ipamibi mo kami.



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID,** Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: BDO UNIBANK, INC. (BDO) PANGANIBAN DRIVE, NAGA CITY
Account Name: CACERES COMMISSION ON COMMUNICATIONS
Account Number: 008440050319